

QUÆSTIO MEDICO-CHIRURGICA,
QUOD LIBETARIIS DISPUTATIONIBUS
manè discutienda, in Scholis Medicorum, die Jovis decimo-quinto
Martii, anni M. DCC. XXXVI.

M. PETRO MALOET, Consiliario & Medico
 Regis ordinario, necnon Domûs Regiæ Invalidorum
 Ducum & Militum, Regiæ Scientiarum Academiæ So-
 cio, Doctore Medico, Præside.

An Chirurgia pars Medicinae certior?

I.

CHIRURGIA esse partem Medicinæ, nemo re attentè perpensa inficiabitur. Hæc à mundi incunabilis ab Altissimo creata, ut præsens sanitas conservetur, amissa restituatur, nullum non movet lapidem, variâque utitur methodo, ut suum assequatur finem. Nunc victu rectâque rerum vitæ necessariarum administratione, alias medicamentis, quandoque manu morbis medetur. Quovis modo hoc exequatur, optatam attingit metam, & à se nusquam diversa est, quæ semper ad eundem collimat scopum; imò mutila & manca esset, si harum methodorum aliquâ destitueretur. Hinc non minori diligentia præcis temporibus Medici, præsertim Parisenses, Chirurgiam excoluerunt, & etiamnum excolunt, quàm Diætericam & Pharmaceuticam. Hinc tanta fuit eorum solertia in perscrutandâ & promovendâ Anatomia, ut inventis eam ditarent innumeris, de illâ libros ediderint quàm plurimos, posteritati proficuos, & omnes alias Europæ scholas ad simile studium excitaverint. Hinc pari sedulitate Anatomiam & Chirurgiam docuerunt & adhuc docent, quâ cæteras Medicinæ partes, quotannis Theſes Chirurgicas disputationi publicæ in suis Scholis exponendo, theatrum Anatomicum publicum ædificando, in illo plures sectiones Anatomicas instituendo, & operationes Chirurgicas celebrando, non dissidentibus Chirurgis, qui in partem operis cum Medicis in eorum scholis venientes, se partem quoque Medicinæ exercere profitentur. Dubio procul, inquiet aliquis, Chirurgia est Medicinæ pars, at saltem illa cæteris præstat certitudine: Quid enim? tota versatur circa objecta sensibus obvia: non aggreditur Chirurgus, nisi quæ sunt fidelibus oculis subiecta, & sub tactum cadentia: non secatur, nisi ubi vult, & quantum vult: seu curam suscipiat vulnerum, ulcerum, tumorum, carierum, fracturarum, luxationum; seu ad aliquam earum, quæ vulgò dicuntur Chirurgicæ operationes, sese accingat: suum semper oculis manumque ducibus opus exequitur. Contra Medicus morbis incumbit, qui visum æquè ac tactum fugiunt, quosque nonnisi conjecturis signisque fallacibus, aut saltem dubiis consequitur; medicamenta præscribit varii & incerti effectûs, quæ regere vix potest, quorumque vim nec retundere, si violentior, nec augere, si remissior, potis est. Hæc oggerunt iniqui rerum aestimatorès, aut parum perspicaces, aut qui rem perfundiorè & cortice tenui intuentur. At si eam, penitus scrutantes, ad trutinam revocare velint, quàm longè à vero discedant, reperient: & Chirurgiam, licet magis sensibilem, cum in judicando, tum in operando, nullâ aliâ Medicinæ parte certiorè, & fortè omnibus aliis minùs certam esse, intelligunt.

II.

JUDICIA Chirurgica, ut ab illis exordium ducatur, circa morborum Chirurgicorum vel diagnofim, vel prognofim, vel medicamenta his adhibenda,

A

vel Chirurgicarum operationum necessitatem, vel denique earum modum versantur, Sed tantum adest ut horum judiciorum fida comes sit semper certitudo, ut potius errorum socium sapenumero habeant. A morborum Chirurgicorum diagnosi ut initium faciamus; quis tantisper in Chirurgiâ exercitatus illam esse certam asserere audeat? Nonne plures morbi Chirurgici ita sunt Cimmericis, ut ita dicam, tenebris obvoluti, ut tactus & oculorum, etiam lynceorum, aciem fugiant, & non detur eorum cognitionem assequi, nisi fallacibus conjecturis? In capitis morbis v. g. an cranii fracturæ, quas nullus tumor, vulnus nullum comitatur, signis certis & univocis dignosci queunt? An rima in interiore cranii tabulâ facta, illibatâ remanente exteriori, ut aliquando evenit, indicis se prodit certis & indubitatis? An à simplicibus cerebri commotionibus, sanguis intra cranium effusus, sui notas exhibet certas? An inter Chirurgo convenit de percussibus, aut contrahisuris, quas alii fictitias & impossibiles contendunt, alii possibiles, & naturæ consentaneas affirmant? An, posito quod dentur, distinctè, clarè & certò percipi possunt? An abscessus, ab ictu, aut casu in cerebro geniti, semper sui existentiam, quam menses integros quandoque celant, & locum, quo degunt, testantur? Jam in morbos pectoris Chirurgicos si inquiramus, illi non certiori subjiciuntur diagnosi, quàm qui sunt capitis. Non enim semper certa est, quæ sanguinem, pus, aut aquam in cavitate pectoris collecta indicare videtur: ideoque rara admodum est Emphysematis operatio, (licet non adeo infrequentes sint morbi recensiti) & ita tardè suscipitur, ut nonnisi ægro ad suffocationis periculum adacto, inausulto ut plurimum eventu celebretur. Nec thoracis vulnera, utrum in ejus cavitatem penetrent, necne, semper proclive est judicatu; quo fit ut, dum illud imperiti Chirurgi curiosè nimis indagare satagunt, specillum temerè in ejusmodi vulnera immittentes, illa gravia, complicata & lethalia plerumque reddunt, quæ per se levia erant, simplicia, & curatu facilia. Sic aliquot abhinc annis, quum miles quidam in parte anteriore pectoris ense vulneratus esset; illi ex parte oppositâ, posteriore nempe, alterum vulnus est observatum; quod quum vidisset Chirurgus, illico, quæ duo esse vulnera videbantur, unicum tantum, atque idem & continuum constituere judicavit; de quo ut certiores se & alios faceret, ad vulnus anterius jam admoto, & in illud penè inserto specillo, ut id ad vulnus posterius, pectus trajiceret, perduceret, ensis vestigium, non sine ægri lacrymis & ejulatibus, quærîtabat: quo à Medico observato, hic ut ab hujusmodi tentamine, aut potius carnificinâ abstineret auctor fuit, ne viam quærendo, quæ forsan non existerat, ægri damno potius faceret, quàm inveniret; in quam sententiam quum itum fuisset, opusque naturæ commissum, hæc sibi soli relicta ambo vulnera, simplici apparatu curata, octo dierum spatium ad cicatricem, & ægrum ad sanitatem perfectam perduxit, qui imprudenti illâ, intempestivâ & malè curiosâ investigatione, aut mortui occubuisse, aut saltem diu & lethaliter ægrotasset, Paulo post hunc casum Militaris quidam Hibernus, ex Centurionum numero, quum ab uno ex sociis suis pluribus ictibus ensis summè teretis in pectore vulneratus fuisset, Chirurgus alter hæc omnia vulnera leviter immissis specillo, non penetrare thoracem, ideoque omnis periculi expertia esse, pronuntiavit; quum vero subinde ad ægrum vocaretur Medicus & illum graviore singultu cum pulsu summopere debili capiteque valde gravato, & sopore obruto tentatum, observaret: quæ symptomata Chirurgus ebrietati, de quâ quidam rumor erat, referebat; nihilominus Medicus illa funesta & lethalia esse declaravit, ægrique rebus ut, quantum & quàm primum fieri posset, consuleretur, censuit & monuit, eventu prognosticum confirmante; Postridie enim è vivis excessit æger: aperto autem ejus cadavere, diaphragma ab uno ex vulneribus, illoque sinistro thoracis lateri inflicto, saucium repertum est, & præterea eodem ictu hepar, in cujus substantiam pro-

fundissimè immergebatur. His duobus casibus luculenter patet, quàm lubricum sit de vulneribus thoracis iudicium, quàmque ægro periculosa sit aliquando eorum indagatio, aut Chirurgi sine indagatione præviâ de his pronuntiatio. Ad morborum abdominis Chirurgicorum diagnosim quod attinet, idem esto de illius vulneribus quàm de his thoracis iudicium; nimirum, an ejus cavum attingant, necne? aut quæ partes ab illis afficiantur, nempe, an hepar, an lien, an pancreas, an mesenterium, non semper certò cognoscitur? Quod etiam locum habet circa abscessus, tumores, in infimo ventre genitos. Nec istorum in-doles ita est perspicua, ut sæpe sæpius non ambigatur, an ad phlegmonis, erysipelatis, aut canceri naturam accedant, non sitque facilis in errorem prolapsus, qui nuperimè nobis accidit erga Monialem. Hæc binos tumores parum à se invicem distantes, mali magnitudine, alterum renetti, apioli alterum, in regione hypo-gastricâ, quatuor digitis supra pubem transversis, summo stipatos dolore, qui à tactu vel levissimo maximè exacerbabatur, à pluribus mensibus gestabat; hos tumores, quos lenta febris, molestæ nausæ, vomitus atroces, ingens cibi fastidium, debilitas summa, alvus præter modum quandoque laxa, quandoque stricta, aliaque symptomata, quæ ægram in lecto detinebant, comitabantur; esse canerosos & incurabiles judicavimus, & nobiscum censuerunt celebres Chirurgi: in quo nos cum his fuisse allucinatos ingenuè fatemur; illis enim ægram, si non radicitus sanatam, saltem recensitis symptomatis, inter alia, dolore, quod præcipuum est, liberam, & ad solita munia, non sine admiratione parique lætitiâ restitutam postea vidimus, & adhucdum videmus. Si ad Chirurgicorum, quos in sinu suo condit vesica, morborum diagnosim descendamus, illi non rarò ita sunt abditi, ut exploratores etiam sagacissimos fugiant, & in errorem inducant. Sic plures calculo laborare crediti, ut tales ad lithotomiam præparati, & in mensam operariam collocati sunt, in quibus calculus nullus repertus est. In aliis ne minimum quidem illius vestigium, specillo etiam teste, deprehensum est, in quorum vesicâ plures existerent, cadaveris eorum apertio palam fecit. Ad morborum Chirurgicorum artus infestantium diagnosim quod spectat, illa nec certior est, nec minoribus difficultatibus scatet quàm cætera; siquidem ea circa horum tumores, fracturas, luxationes, retractiones, qui frequentiores sunt horum affectus, non sunt erroris immunes. Hinc ab aliquibus Chirurgis falsum aneurisma post poplitem, pro phlegmone assumptum vidimus. Hinc ab aliis tumor levis, cum dolore summo secundum longitudinem cruris expositus, effusioni materiæ, quæ crure aperto, & usque ad os secundum eandem longitudinem inciso, nulla inventa est, adscriptus est. Hinc dolor manus tendinum extensioni à Chirurgi quodam relatus, quem à cubiti fracturâ exoriri dedit Medicus. Hinc tibiar plicatura & flexio seu retractione continua, pro anchylosi assumpta est à Chirurgis, quos vocant majoribus, quæ à tendinum contractione oriri dedit Medicus.

III.

SI in morborum Chirurgicorum diagnosi tam incerta sunt judicia Chirurgica, eruntne in illorum prognosi certiora? nemo est, ut puto, qui credat, ideoque parum in iis immorabimur; cum nullus sit morbus Chirurgicus, quantumvis parvus, nulla operatio quantumcumque levis, quorum eventum felicem spondere audeat Chirurgus; & meritò quidem; enim verò à vel leviori cutis laceratione, clavo pedis resecto, avulso dente, sectis linguae venis rani-nis dictis, mortem illatam fuisse non ignoratur. Illa incisionem in gingivis scal-pello, dentium genuinorum eruptioni favendi causâ, factam, teste Tulpio, subsecuta est. Sed quid tamdiu moror? Quot funera audivimus in Germaniâ & Italiâ ex levissimis, ut putabatur, vulneribus orta? Hic ex parvâ tibiar plagâ, quæ periculo vacare ferebatur, diem supremum obiit, ille ab aliâ pectori inflicta, ex quâ eum sanatum dicebant, è vivis excessit, ille ex levi contusione de me-

dio sublati est. Dies me potius deficiat quam eorum qui in duobus ultimis præliis in Longobardiâ commissis, à vulneribus levibus acerbæ præda fuerunt libitinæ, numerum absolvam. Quoad judicia, quæ circa medicamenta morbis Chirurgicis accommoda, versantur, nihil ea tam incerta probat esse, quam illorum varietas, quæ tanta est, ut sæpe tot diversa remedia proponantur, quot Chirurgi de eodem morbo Chirurgico consuluntur. In phlegmone, v. g., hic cataplasma anodynum proponit, ille emolliens, hic resolvens, alter suppurans & maturativum. In Erysipelate, ille oxiceratum, hic vitæ, hic calcis aquam, is puram, iste cum aquâ mixtam, ceratum refrigerans alter, alius radicum altheæ decoctum, alii alia præscribunt. Circa operationum necessitatem, Chirurgiam in suis de eâ iudiciis incertam esse arguitur ex illorum varietate, quæ frequens est, in pluribus circa eundem morbum opinantibus. In quibusdam enim casibus inter Chirurgos alii, eam operationem necessariam affirmant, quam alii non necessariam asserunt, ut pote qui sine eâ ægrum sanari posse contendunt. In magnis vulneribus brachii, carpi, metacarpi, tibiæ, tarsi, metatarsi, non unanimum esse Chirurgorum consensum experientia docet. Sæpe enim alii ad ultimum remedium, amputationem nempe membri, tanquam ad sacram anchoram confugiendum esse clarnant, alii ab illâ abstinere debere defendunt; ut multoties accidisse notum est, sed præsertim erga generalem castrorum præfectum, qui primam aciei instructæ frontem tenens, quem vulneratus fuisset in tibiâ, hanc plures Chirurgi, qui eum inviserant, amputandam esse pronuntiaverunt: sed Regius Proto-Chirurgus, huc à Rege missus, salvari posse censuit, & hæc suâ sententiâ, (quæ bona semper fuit hujus summi ducis fortuna,) conservavit; nam pro eâ quâ valer in Chirurgiâ cum iudiciis sagacitate, tum operibus industriâ, illam sic medicamentis idoneis curavit, ut deinceps perfectè sanata fuerit. In aliis casibus alii operatione tolli non posse arbitrantur morbum, quatenus incurabilem, à quo alii eâ ægrum sanandum fore sibi persuasum habent. Aliquoties alios quædam symptomatibus morbum comitantibus ab operatione averrunt, quæ secundum alios illi nullatenus officiunt. Sic in Milite quodam, qui ulcera fistulosa in pede ab ossibus rarsi & meratarfi carie exefis producta habebat, febris hæc concomitans Chirurgum, aliunde peritum, à tibiæ amputatione sic deterrebat, ut ægrum miseræ suæ sorti relinquendum decrevisset; quoties autem illi de amputatione tibiæ verba faciebat Medicus, tolle febrim, inquiebat Chirurgus, ego tollam tibiâ; cui Medicus: tolle tibiâ, & tolletur febris. Dictum factum: Amputata enim fuit Medico auctore, & (sic postulante Chirurgo) sponse, tibiâ, & triduo post evanuit febris, quam symptomaticam & ab ulceribus pedis productam esse judicaverat, ægerque planè convaleuit. Aliâs æroti vires tantillæ sunt aliquando, aut saltem videntur quibusdam, ut ii illas operationi, alioquin necessarie, impares existiment; dum alii eas pares putant. Sic in viro animi magnitudine, & generis nobilitate illustri, qui femoris os magnam partem corruptum & carie ira inductum habebat, ut nulla salutis affulgeret spes, nisi in cruris amputatione; aliqui ex Chirurgis annuebant, sed multo plures propter virum ægri debilitatem, quæ magna erat, renuebant: ideoque diu dilata, & ob id æger in summum vitæ discrimen adactus est; tandem, licet serò nimis, Medici consilio, felici cum successu, facta fuit. Quod facit iudiciorum Chirurgicorum de operationis alicuius faciendæ necessitate varietas, in pluribus circa eundem morbum opinantibus, ad Chirurgiæ incertitudinem demonstrandam; numquid idem non faciet error, qui eadem iudicia obnoxia sunt, in unanimiter sentientibus circa hanc ipsam operandi necessitatem? Error, inquam, qui sæpe nimis accidit, & quem olim obfugisse erga exercitiis præfectum jam laudatum, ostensum est; cum omnes Chirurgi qui illum inviserunt, solo excepto Regio Proto-Chirurgo, amputandam

esse ejus tibiam, falso judicaverint. Huic casui ferè similis est alter qui evenit in Milite falsà tibiâ anchylose supra citatâ detento; hanc enim quum pro verâ, ut supra innuimus, haberent Chirurgi plures, quorum alii seorsim, conjunctim alii consulti fuerant; omnes tibiam affectam amputandam esse censuerunt. Atque adeo æger ad operationem dispositus est, omniaque necessaria præparata fuisse, quum Medicus hujus rei monitus, morbumque attentè perpendens, illum non esse veram, sed falsam anchylosim, seu simplicem musculorum tibiæ flexorum contractionem, invenit, ideoque amputationi tibiæ adversatus, ægro balnei aromatici usum præscripsit, quo solo remedio per quindecim dies usurpato, tibiâ usque adeo flexa, seu retracta & rigida, omnisque extensionis incapax, tum pristinæ suæ extensioni, & molli ad eam facilitati restituta est, ægerque perfectam sanitatem recuperavit, denuò militiæ nomen dedit, & in eam professus est. (a) Circa modum operationes Chirurgicas celebrandi, quum non minor sit varietas, quàm circa earum necessitatem, non minor est quoque indelectu incertitudo, ut & difficultas. Exemplo sit vesicæ scditi calculo laborantis, hanc diversi Chirurgi diversimodè proponunt, & unusquisque eorum methodum sibi familiarem cæteris antepont. Hic, v. g. à partibus magni, quem vocant, apparatus stat; isti altum, aut superiorem tollunt ad sydera; illi lateralem omnibus præferunt, & hos inter, alii Ravianam, seu fratris Jacobi, methodum, alii Cheseldenianam omnibus aliis antecellere prædicant; quæ verò primas tenere debeat, adhuc sub judice lis est; tantæ molis est illam dirimere.

I V.

NUNC operationes Chirurgicas, quantumvis necessariæ supponantur, quacumque methodo administrantur, & à quovis Chirurgo celebrentur, incertas esse, sive quod idem est, incertum esse earum eventum, ostendendum nobis restat. Quod ut faciliùs exequamur, illas in duas Classes dividemus, leves nempe, & magnas. Circa leves, funestus, quem aliquando, licet rarò sortiuntur, exitus, satis superque evincit, illas non esse certas; quis enim nescit omnium operationum maximè vulgaris & trita, phlebotomiam intellige, infortunia? Quis ignorat tendinum punctiones, inflammationes, abscessus, nervorum læsiones, aneurismata, cum vera, tum falsâ, mortes & pericula ex illâ orta. Hinc est quod Chirurgi, qui aliquod sibi nomen compararunt, ab eâ prudentes abstinere. Recens adhuc est misera fors, quam audivimus & supra retulimus habuisse, levem cutis lacerationem, avulsam dentem, excisam verrucam, sectas linguæ venas raninas dictas, ita ut nulla sit operatio tam levis, cujus eventum, in se suscipere audeat sapiens Chirurgus. Ad magnas quod attinet, non est quod diu immoremur in earum incertitudine demonstrandâ; si enim leves non sine periculo instituuntur, id à fortiori verum est de majoribus, quæ magna pars ægrorum in quibus fiunt, è medio tollitur. Dubitas? illa, quæ in bellicis annorum elapsum expeditionibus factæ sunt, te certiores facient, quæ pauci ab innumeris evaserint, & stupebis miraberisque, in cujusquam ventem venire posse, non esse incertam, aut etiam Medicinâ certiores esse Chirurgiam, quæ quamvis ad ægrorum salutem sit comparata, tamen, ut illud iterum dicam, à magnis ejus operationibus maxima horum pars perit. Hæres adhuc, aut exaggerationis insimulas? Nosocomia lustra; ibi à terebratione vix ullum servari comperies: à lithotomiâ è viginti sectis, octodecim quandoque ad plures migrare discis. Mitto alias operationes, amputationes, v. g. castrationem, cancerorum & tunicatorum tumorum extirpationem, punctiōnem, illaque, quæ bubonocelæ, empyemati, fistulæ lacrymali, &c, debentur, & quæ licet optimè & secundum præscriptas regulas gerantur, illis tamen magnam

+ pericula

(a) Huc redeunt casus duorum alicujus juvenum, quorum cum quisque calcaneum carie erosum haberet, eorum cujusque tibiâ amputationi addixerunt Chirurgi plures, quas Medicus præscriptis medicamentis, consumendis planèque destruendis ossibus cariosis aptis, servavit.

agrorum partem interire compertum est. Taceo illas, quæ præposterè & contra regulas celebratæ, agros trucidant, vesicam in sectione laterali utrinque perfossam, id est, in fundo forcipibus perforatam, intestinum rectum per medium, & in duas partes scissum, urethram transversim sectam, & à vesica penitus separatam, aut cathedere, falsum tramitem sibi faciente, pertusam: ignota aut audita non loquor, sed visa. Omitto agros, ligaturæ malè peractæ vitio, hæmorrhagiâ occumbentes. Sed & res & occasio postulant, ut referamus gangrænam & sphacelum hujus intempestivo metu orta; quod accidit Centurioni cuidam, qui à viginti annis adiposam in brachio gestabat lupiam, ponderis levis, & doloris expertem, quam idcirco viginti adhuc annos & amplius gestate verisimiliter potuisset, firmæ enim aliunde erat valetudinis; sed pondus illud, quamvis leve, ægrè ferens, aut potius vitæ, ut credere est, pertæsus, hanc lupiam invitis amicis, Medico etiam dehortante, sibi extirpari voluit, & suæ perviciacæ pœnas dedit, nam perendino ab operatione die, è vitâ excessit, oris, quæ manè prædixerat Medicus, in brachio gangrænâ meridie, sphacelo serotinis horis, à machinâ quâdam, Ad sistendum sanguinem in membrorum amputationibus excogitatâ, malo hujus Centurionis fato, summo ejus brachio applicitâ, diemque integrum & dimidium, reclamante Medico, obstinatè relictâ ad sistendam, aut potius præcavendam, quæ metuebatur, licet nulla fuerit, nec timenda esset, hæmorrhagiam, cum sine sanguinis effusione & ullius arteriæ, quæ ligari meruerit, apertione peractâ fuit operatio. Silco operationes quæ suscipiuntur, in ægris illis mindis aptis, vel sine præparatione præviâ, aut eâ malè adhibitâ. Mortes enim indè consequutæ, non Chirurgiæ, sed Chirurgo debentur; ut obtigit ab amputato brachio, cuidam ægro, qui ascite & diarrhœâ laborare compertus est ipsomet operationis die, quâ deinceps fato functus est, & quæ, inconsulto Medico, celebrata fuit à Chirurgo horum morborum incitio. De his quoque dicere supersedeo operationibus, quibus licet æger non pereat, non sanus tamen & solpes evadit; dum v. g. sectâ vesicâ calculus præ mole gandior, non extrahitur, aut quum illo extracto alter relinquitur, qui post ægri curationem, urò aut altero mense elapso, tragœdiam renovat, novisque cruciatibus & operationibus viam sternit, aut quum uno aut pluribus calculis extractis æger fluxu urinæ involuntario aut fistulâ superstite affligitur; quod idem accidit in pluribus vulneribus aliisque operationibus, aut quum post operationes ani, aut lacrymali fistulæ dicatas, alvi fluxus, aut illacrymatio sequuntur; aut quum, postquam demissa fuit cataracta, illa in pristinum suum, quod frequens est, reponitur locum; aut quum ejus depressio inflammationes molestas, ophthalmias contumaces, diros dolores atque diutinos, quod frequentius est, producit, aut denique, quum, illâ dejectâ, visus non restituitur, quod frequentissimum; non loquor de ejus in anteriorem oculi cameram, ut vocant, transitu, quia rarus est; aliaque bene multa prætereo, ne longior sim, nullusque mihi dicendi finis occurrat. Ast, inquiet aliquis, non est vitæ ægorantis, aut ejus sanationis, neque suarum operationum successûs sponzor Chirurgus, sed ipsarum concinnitatis, suæque peritiæ & dexteritatis in amputando membro, v. g. in extirpando cancro, &c., ideoque, modò illæ operationes peragantur secundum præscripta Chirurgica, nihil ab eo amplius expectandum est; neque, si moriatur æger, ideo minus certus est peritus Chirurgus suarum operationum, seque illas secundum artis leges esse exequutum, & ab his, quod est sui officii, ne latum quidem unguem recessisse, & in eo sensu Chirurgia dici potest ars certa. Bone Deus! quis talia audiendo se teneat, & à risu temperet? quasi vero artis cujuspiam defectum & incertitudinem aliquid probeat magis, quàm insontem esse artificem, quum insaufum operatio ejus sortitur eventum? Aut Chirurgia esset ars non sanandi, sed operandi, & Chirurgus operaretur ad peritiâ suam significandam,

non verò ad sanitatem ægro conciliandam? Nonne hoc esset de corio humano lude-
re? Porro quid ad ægrum concinnitas operationis, quâ ille infelix cadit victima?
Uno verbo, aut Chirurgus, saltem qui suo Marte agit, operatur ut sanet, vel
non? Si primum? quum non sanat, fallitur, non est enim sui voti compos, & fi-
nem suum non assequitur. Si secundum? fallit, non enim vocatur ut solertiam suam
ostentet in operando, sed ut operatione ægrum à morbo liberet. Est igitur Chirur-
gia aut fallax, aut incerta.

V.

BENE quidem, regetur aliquis, ultro fatendum est Chirurgiam in iis quæ sunt
praxeos esse incertam: sed hoc non impedit quominus illa certior sit Medici-
nâ, omnibusque aliis ejus partibus. Et hoc est de quo nunc agitur. Non obstanti-
bus enim quæ de Chirurgiâ dicta sunt, habet illa principia certa, quæ nihil Geo-
metriæ principiis cedunt, quorum applicatio, cum sit sensibilis, evidens est: Sed
quæ Medicinæ pars in omnibus quæ sunt praxeos incerta, poterit esse certior aliis
Medicinæ partibus, quantumcumque illæ incertæ supponantur? insuper; non-
ne ista habent quoque sua axiomata certa & inconcussa Geometriæ principiis æqui-
paranda? Nonne hæc certa sunt in Pharmaceuticæ, seu illâ Medicinæ parte, quæ
medicamentis morbis medetur; nempe esse ablegandam morbi causam, mitigan-
da illius symptomata, conservandas aut refocillandas ægri vires, tollendam ple-
thoram, evacuandos humores noxios aut redundantes, corrigendam pravam san-
guinis diatêsim, compescendum illius motum fervidiorem & citatiorem, excitan-
dum tardiorem, reserandas obstructions, constringendum quod præter naturam
laxum est, laxandum quod est nimis constrictum, &c? Nonne hæc quoque certa
sunt in diæterice, seu illâ Medicinæ parte, quæ victu morbos curat, scilicet, in
morbis acutis diætam tenuem quàm maximè necessariam esse; appetitum prostrato,
ægros ad cibos nunquam esse cogendos; corpora impura, quò plus nutriturum, in
morbis præcipiti, eò magis lædi; in morbis chronicis tantum ciborum esse conce-
dendum, quantum conservatio corporis requirit; potum sufficientem in omni mor-
bo esse optimam medicinam; ubi calor, quum maximè urget, ibi potum vini no-
xium esse; in omni morbo aërem temperatum esse maximè necessarium, ad promo-
vendas salutare excretiones; aliaque innumera, quæ, brevitatis causâ, omitto. Si
quis putat horum axiomatum applicationem esse difficiliorem, aut magis incertam,
quàm eorum quæ sunt Chirurgiæ, errat toto cælo, cum è contra sit multò facilior,
certior, ejusque effectus, ut plurimum, promptior. Reclamas? Ea, quæ sunt Chi-
rurgiæ, cum iis, quæ sunt Medicinæ, confer, operationem cum operatione, leve
vulnus cum leviore morbo, grave cum graviore, & Medicinam facilius, tutius,
certius operationes suas edere, quàm Chirurgiam, comperies. Sit, v. g. quid no-
xium aut redundans in corpore? Præsto sunt in illâ Medicinæ parte, quæ Diæterice
vocatur, diætâ tenuis, largus aquæ potus, exercitium moderatum, aeris mutatio,
balnea tum frigida, tum calida, hypocausta, frictions, carnis-privium, ichthyoph-
agia: in illâ vero parte, quæ Pharmaceuticæ dicitur, emetica, purgantia, dia-
phoretica, sudorifica, diuretica, errhina, masticatoria, simplicia demum & con-
posita medicamenta. Porro in Chirurgiâ, amputatio, paracentesis pectoris, abdo-
minis, lithotomia, extirpatio, avulsio, castratio, incisio, denique ferrum & ignis.
Quasnam ex his operationibus certiores putas? An Chirurgicas? An Medicas, id
est, Diætericas, & Pharmaceuticas? Nonne illas à quibus minùs impendet pericu-
li? Sed ab amputatione cruris minùsne opinaris impendere periculi, quàm à diætâ
tenui, aut ab emetico? à lithotomiâ, quàm à largo aquæ potu, aut à purgatio-
ne? à paracentesi pectoris, quàm ab exercitio moderato, aeris mutatione, aut à
diaphoreticis? à paracentesi abdominis, quàm à balneis frigidis, aut à diureti-
cis? à castratione, quàm à balneis calidis, aut à sudorificis? à canceri extirpatio-
ne, quàm à frictionibus, aut à masticatoriis? ab incisione, sive bubonocèles
& fistulæ operationibus, polypi avulsione, quàm ab hypocaustis, aut ab errhi-

nis & sternutatoriis? à ferro demum & igne, quam à carnis-privio, & ichthyophagiâ? Rides, & horum collationem non esse seriam dicis? Erras: seria est. Sunt enim, qui seriò Chirurgicas operationes medicis operationibus certiores esse affirmant; quo titulo & fundamento, ipse iudex esto: Cùm ab emetico, purgatione, diureticis, aut sudorificis, è viginti ægris, vix unum aut alterum, illosque sæpe falsò, audias denatos; à terebratione vero, paracenthesi, præsertim pectoris, lithomiâ, amputatione artuum, maximè cruris, vix unum, aut alterum, quandoque salvos videas. Quid quod, licet Medicos satyrici, histriones & mimi, ridiculi causâ, tanquam interfectores in scenam traducant, de Medicinâ tamen illam quemquam occidere nemo unquam dixit, nec jure dicere potest, quum nullum sit medicamentum, quod per se non sit salutiferum, & mortem inferat; si verò illud quandoque accidit, quod credere piaculum ducimus, non Medicinæ tribuendum, sed Medici inscitæ, quâ salutifera medicamenta malè applicita, lethifera evadunt, quum enim bene applicantur, semper innocua sunt. Idem de Chirurgiâ dici non potest, cùm Chirurgiæ operationes, quantumlibet dexterè, & à perito Chirurgo celebrentur, nihilominus tamen ægros saltem aliquos, quandoque per se de medio tollere negari non potest, aliàs diu victuros. Sic noti sunt multi quos à brachii, aut cruris amputatione, canceri aut lupiæ extirpatione, vesicæ sectione, aliisque operationibus Chirurgicis, licet solertissimè peractis, certò perisisse constat, quosque pariter diu vivere potuisse, si Chirurgiâ non litassent, constabat; num in his operationibus certam fuisse Chirurgiam dicent Chirurgiæ certitudinis fautores? Si dicant: saltem de certâ, quam illa intulit, nece, se illud intelligere fateantur. Lepida sanè certitudo artis restituendæ sanitati dicata, quâ pluribus vitam adimi certum est! Talem Chirurgia nec invidet, nec sibi vindicabit Medicina certitudinem. Ergone Chirurgia erit ars, nocens, infida, damnosa, ideoque rejicienda, & exilio, sicut olim Romæ, multanda? Absit talia cogitemus de arte, quæ, cùm sit Medicinæ pars, Deum habet auctorem, & quæ licet in penè omnibus suis operationibus incerta sit, sæpe tamen utilis est, imò utilissima, & sine quâ Medicina ipsa esset clauda, aut potius suorum crurum altero destituta. Absit hac convicia proferamus in artem, quæ cultores habet eximios, solertes, sedulos, sagacitate & peritiâ claros, quos eò magis laude & æstimatione publicâ dignos censemus, quò pluribus sunt adjumento, artem incertam exercentes; tanto enim splendidius elucet industria artificis, absit verò invidia, quantò major est artis quam proficitur difficultas, & incertitudo. Multum igitur abest ut hos quæstione propositâ, aut ejus solutione laceßere, aut ullo modo carpere animus sit, quin potius illos liberamus à fide-jussione infaustorum exituum, cùm incertitudinem, cui imputari semper possunt, & sæpe debent, assignamus Chirurgiæ. Equi igitur, bonique consulant, dum illam nihil certi habere præ aliis partibus Medicinæ demonstramus, & hanc, quæ ex dictis patet, conclusionem elicimus.

Ergo Chirurgia non est pars Medicinæ certior.

DOMINI DOCTORES DISPUTATURI.

M. Henricus-Francisus Bourdelin.

M. Antonius-Joannes Daval.

M. Otto-Casimirus Barselnecht.

M. Robertus - Hubertus Linguet.

M. Achillet - Francisus Fontaine.

M. Joannes-Baptista-Ludovicus Chomel.

M. Alexander-Petrus Maillot.

M. Petrus - Joannes Burette, Professor Regius, & è Regiâ Numismatum Academiâ.

M. Petrus Marais.

Proponebat Parisiis, CAROLUS PAYEN, Parisinus, Baccalaureus Medicus A. R. S. H. 1736. à sextâ ad meridiem.